



Sarajevo, 4.12.2017.

Referentni broj poziva: IMEP/MGS-E-01

Javni poziv za nezavisne vanjske procjenitelje projektnih prijedloga

Program jačanja nezavisnih medija (Independent Media Empowerment Program – IMEP) raspisuje poziv u cilju uspostave baze nezavisnih vanjskih procjenitelja za ocjenjivanje projektnih prijedloga u okviru svoje šeme dodjele grantova medijima, udruženjima, novinarima i građanima novinarima. Cilj nam je osigurati zadovoljavajući broj kvalificiranih stručnjaka svih profila (vidi Kvalifikacije), koji bi prema potrebi bili dostupni za procjenu projektnih prijedloga, te iz tog razloga uspostavljamo sveobuhvatnu bazu vanjskih procjenitelja. Baza će se dopunjavati godišnje, javnim pozivima za nezavisne procjenitelje projektnih prijedloga.

Više informacija o otvorenim pozivima za projekte u okviru IMEP-a moguće je pronaći na web stranici www.objavi.ba u rubrici “Grantovi”.

O Programu

Jedan od ciljeva “Programa osnaživanja nezavisnih medija” (“Independent Media Empowerment Program” ili skraćeno i u nastavku: IMEP) je doprinos jačanju nezavisnosti medija i slobodi izražavanja u BiH kroz jačanje održivosti medijskih kuća, podizanju kvaliteta medijskih sadržaja i izgradnji kompetencija novinara.

Bitan dio IMEP-a je Šema medijskih grantova, čiji su ciljevi:

- 1) Podržati produkciju visokokvalitetnog sadržaja, ojačati nezavisnost medija
- 2) Poboljšati doseg medija do korisnika i komunikaciju s njima
- 3) Promovirati inovativni pristup i kritičko razmišljanje
- 4) Doprinijeti boljem okruženju za rad medijskih kuća i novinara
- 5) Ojačati kapacitete novinara i medija i primjenu profesionalnih standarda
- 6) Promovirati ravnopravnost spolova, EU integracije BiH, jednaka prava za sve i druga pitanja od interesa za demokratizaciju bh. društva

Vrste grantova

IMEP-ova Šema medijskih grantova se sastoji od četiri vrste grantova (bespovratne finansijske pomoći):

1. **Media production** grantovi biće dodijeljeni privatnim medijima koji će prakticirati, promovirati i kreirati sadržaj sa naglaskom na nezavisnom novinarstvu. Grantovi za medijsku produkciju imaju za cilj da podrže proizvodnju i distribuciju sadržaja koji će angažirati javnost, naglašavajući društvena pitanja, kao što su izgradnja mira, jednaka prava za sve, borba protiv korupcije, BiH na putu EU, učešće žena u politici i poslovanju, kritična pitanja od značaja za određenu lokalnu zajednicu (ili zajednice), sva druga pitanja koja se odnose na aktuelne događaje značajne za građane BiH. Pristup temi mora prevazići puku prezentaciju činjeničnih informacija i podstaći kritičko razmišljanje.
2. **Media Mixer** grantovi biće dodijeljeni partnerstvu privatnih medija i organizacije civilnog društva (ili više OCD) za inicijative koje će zagovarati i promovirati ideju nezavisnog novinarstva, kao i podsticanje nezavisnih akcija i proaktivnog razmišljanja. Podnosioci prijava se podstiču da se bave pitanjima izgradnje kapaciteta novinara i aktivista, umrežavanja, promjene zakonodavnog okruženja vezanih za rad nezavisnih medija, slobodu informisanja i druge aktivnosti u vezi sa omogućavanjem okruženja za nezavisno novinarstvo u Bosni i Hercegovini.
3. **New Voices** grantovi biće dodijeljeni pojedincima kao što su nezavisni novinari, vlogeri, blogeri, fotografi i građani koji žele da kreiraju medijske sadržaje (novinari građani), za medijske sadržaje koji uključuju građansku hrabrost, aktivizam, pozitivne priče, poziv na akciju i slično, a koji su u skladu sa ciljevima IMEP-a.
4. **Ad hoc grantovi** se dodjeljuju za medijske intervencije vezane za nepredviđene i hitne događaje i situacije koji se mogu desiti, ali ne moraju nužno spadati u neku od ostale tri vrste grantova.

Kriteriji za prijavu

Od potencijalnih vanjskih procjenitelja će se tražiti sljedeće:

Kvalifikacije:

- Visoka stručna sprema u području društvenih nauka (prednost će imati stručnjaci s magisterijem i/ili doktoratom).

Opće profesionalno iskustvo:

- Najmanje 5 godina profesionalnog iskustva vezanog za medije

Specifično profesionalno iskustvo:

- Specifično medijsko iskustvo: štampani mediji, elektronski mediji, društvene mreže, video produkcija, PR, i ostalo relevantno iskustvo. Posjedovanje kombinacije specifičnih iskustava vrednovaće se kao prednost.
- Prednost će imati eksperti koji imaju prethodno iskustvo u procjeni projektnih prijedloga (kao član komisije za ocjenjivanje, i/ili kao nezavisni procjenitelj).
- Iskustvo u upravljanju/provedbi/praćenju projekata vrednovaće se kao prednost.

Prije početka pojedinog postupka evaluacije za projekte u okviru Šeme medijskih grantova IMEP-a, eksperti koji ispunjavaju gore navedene kriterije i koji su odgovarajućeg profila bit će kontaktirani radi provjere njihove dostupnosti u traženom periodu, a CPCD će sa odabranim stručnjacima zaključiti ugovore. Prednost će imati oni stručnjaci koji imaju više profesionalnog iskustva u području relevantnom za pojedini poziv za projekte.

Važna napomena: U svrhu izbjegavanja mogućeg sukoba interesa stručnjaci koji su bili uključeni u pripremu pojedinih projektnih prijedloga, ili rade za neki od medija koji su aplicirali na taj poziv za projekte, neće se uzimati u obzir za ulogu procjenitelja na tom pozivu za projekte.

O pojedinostima postupka izabrani će kandidati biti obaviješteni naknadno kada će se po potrebi za njih organizirati i pripremna radionica o načinu procjene projekata. Od nezavisnih procjenitelja se osim procjene projektnih prijedloga može tražiti i sudjelovanje na sastancima Odbora za ocjenjivanje u funkciji promatrača sa svrhom predstavljanja rezultata procjene te davanja odgovora na potencijalna pitanja članova Odbora za ocjenjivanje.

Nezavisni procjenitelji imaju pravo na naknadu za svoj rad.

Stručnjaci zainteresirani za angažman u procjeni projekata u okviru IMEP-a dužni su dostaviti:

1. Prijavni obrazac (u prilogu)
2. CV (u prilogu)

Obrasce je potrebno ispuniti (CV na engleskom jeziku) i dostaviti putem emaila grantovi@objavi.ba najkasnije do 20.12.2017.